

## DITUMEDISO TSA SELEMO SA 2026/27

### "DIDACHE"

#### "Dithuto Tsa Morena Ho Bahetene Ka Baapostola Ba Leshome Le Metso E Mmedi"

#### **Kgaolo 1**

Tsela di pedi – e nngwe ke ya Bophelo, e nngwe ke ya Lefu – mme ho na le phaphang e kgolo mahareng a tsona. Tsela ya Bophelo ke ena: "Sa pele, o tla rata Modimo ya o entseng; sa bobedi, o tla rata baahelwane ba hao jwalekaha o ithata; mme eng kapa eng eo o sa rateng ha e ka etswa ho wena, o se e etse ho e mong." Jwale, thuto ya mantswe ana ke hore: "Hlohonolofatsang ba le rohakang, mme le rapelle dira tsa lona, le be le ilele ba le hlorisang. Hobane o fumana moputso o feng ka ho rata ba o ratang? Ana le bahetene ha ba etse jwalo?" Empa molemong wa hao, "rata ba o hloileng," mme o keke wa eba le sera. "Ila ditakataso tsa nama." "Ya o qophellang ho tsamaya le yena mehato e sekete, o ye le yena mehato e kete di pedi. Ya o nkelang baki, o mo fe le hempe ya hao hape. Ya batlang ho o nkela sa hao o se mo hanele" – le ha ebe o kgona ho mo hanela. Efa bohle ba o kopang, o se ba hanetse, hobane ke thato ya Ntate hore re fe bohle ho tswa dimphong tseo re di amohetseng. Ho lehlohonolo ya fanang ho ya ka taelo; hoba ha a na molato. Ho madimabe ya amohelang; hobane ya amohelang dithuso tlasa kगतello ya ho hloka, ha a na molato – empa ya amohelang dithuso a sa hloke o tla qosetwa hore hobaneng a nkile ebile, ha a se a le tjhankaneng, o tla hlahlojwa mabapi le diketso tsa hae, " mme ha a kake a tswa moo ho fihlela a lefile tjheletana ya ho qetela." Empa mabapi le sena ho ile ha boela ha thwe, "Dimpho tsa hao di se fufulelwe matsohong a hao ho fihlela o tseba hore na o fa mang."

#### **Kgaolo 2**

Empa taelo ya bobedi ya thuto ke ena: "O se ke wa bolaya", o se ke wa feba", o se ke wa etsa bosodoma; o se ke wa etsa bohlola; o se ke wa utswa; o se ke wa sebedisa boselamose; o se ke wa sebedisa ditlolo tsa lerato; o se ke wa ntsha mpa, kapa wa bolaya masea; " o se ke wa lakatsa thepa ya moahelwane wa hao ", o se ke wa bua leshano, o se ke wa fana ka bopaki ba bohata,"; o se ke wa bua bobee"; o se ke wa jara lonya. O se ke wa ba le dikelello tse pedi kapa maleme a mabedi, hobane ho ba teme-pedi ke leraba la lefu. Puo ya hao e se ke ya eba leshano, kapa lefeela, empa e phethele ka ketso. O se ke wa ba mohono kapa wa tlatlapa, leha e le ho ba moikaketsi, kapa lonya, kapa ya ikgohomosang; o se ke wa etsa morero o mobe kgahlanong le moahelwane wa hao. O se ke wa hloya motho le ya mong; empa ba bang o tla ba kgalema, mme ba bang o tla ba rapella, ha ba bang o tla ba rata ho feta bophelo ba hao.

#### **Kgaolo 3**

Ngwanaka, baleha motho e mong le e mong ya mobe, le bohle ba tshwanang le yena. O se ikgohomose, hobane boikgohomoso bo lebisa polaong. O se be le mona, kapa kgang, kapa takatso e matla – hobane tsena kaofela di tswala dipolao. Ngwanaka, o se ke wa ba le takatso e fetelletseng, hobane takatso e jwalo e lebisa ho bohlola. O se be sebui sa

mantswe a mabe, kapa motho ya phahamisang mahlo, hobane tsena tsohle di tswala bofebe. Ngwanaka, o se natse dithatho, hobane sena se lebisa borapeding ba ditshwantsho; o se sebedise bohohe, kapa wa ba senohe, leha e le selamose; ebile o se lakatse ho bona dintho tseo, hobane tsohle di tswala borapedi ba ditshwantsho. Ngwanaka, o se ke wa ba raleshano hobane ho bua leshano ho lebisa boshodung, o se be morati wa tjelete, kapa moikgohomosi, hobane dintho tsena kaofela di tswala boshodu. Ngwanaka, o se ke wa korotla, hobane sena se lebisa ho nyefolo; o se be manganga, kapa motho ya nahanang bobbe, hobane tsena tsohle di tswala nyefolo. Empa eba "bonolo, hobane ba bonolo ba tla ja leruo la lefatshe", tiisetse, o be mohau, le ho hloka mano, le ho kgutsa, le ho loka, ebile o se ke wa iphahamisa kamehla, mme o se dumelle le hore moya wa hao o iketelletse pele. Moya wa hao o se be le kamano le baikgohomosi, empa o tsamaye le batho ba lokileng le ba ikokobeditseng. Amohela dikotsi tse o hlhelang di le molemo, tsebong ya hore ha ho letho le etsahalang ntle le Modimo.

#### **Kgaolo 4**

Ngwanaka, o hopole, bosiu le motsheare, ya buang lentswe la Modimo ho wena, mme o mo hlomphe jwaleka Morena – hobane boteng ba Morena bo moo ho buuwang ka semelo sa Hae teng. O batle boteng ba ba halalelang tsatsi le leng le le leng, hore o tle o fumane phomolo mantsweng a bona. O se ke wa lakatsa karohano, empa o boelanye ba qabanang. O fane ka kahlolo e lokileng; o se nke lehlakore la motho ha o kgalema tlolo. O se ke wa ba le menahano e mmedi, ho sa natsehe seemo. O se ke wa ba ya otlollang matsoho ho amohela, empa ya a kwalang ha a tshwanela ho fana. Ho eng kapa eng eo o e fumaneng ka matsoho a hao o tla fana ka thekollo bakeng sa dibe tsa hao. O se ke wa tsilatsila ho fana, ebile o se korotle ha o fana, hobane o a tseba hore na molefi wa moputso ya molemo ke mang. O se ke wa furalla bahloki, empa o arolelane ntho e nngwe le e nngwe le ngwaneno, mme o se ke wa re ke ya hao – hobane haeba le le ba arolelanang dintho tse ke keng tsa senyeha, ho hakae dinthong tse senyehang? O se ke wa finyetsa letsoho la hao ho mora wa hao kapa ho moradi wa hao, empa o ba rute tshabo ya Modimo ho tloha botjheng ba bona ho ya hodimo. O se ke wa laela lekgoba la hao kapa lekgabunyane la hao ka bohale, haholo-holo le tshepang Modimo ya le mong jwaleka wena – esere la kgaotsa ho tshaba Modimo ya le okametseng ka bobedi ba lona; hobane Modimo ha a tle ho bitsa batho ho ya ka tlhompho ya batho, empa o bitsa bao Moya o ba lokisitseng. Empa lona bao le leng makgoba, le be tlasa monga lona, jwalo ka moemedi wa Modimo, ka tlhompho le tshabo. O hloye boikaketsi bohle, mmoho le ntho e nngwe le e nngwe e sa kgahliseng Morena, empa o boloke seo o se fumaneng, "o se ke wa eketsa le ho tlosa letho ho sona." O ipolele ditlōlo tsa hao phuthehong, mme o se ke wa ya thapelong ka letswalo le lebe. Ena ke Tsela ya Bophelo.

#### **Kgaolo 5**

Empa Tsela ya Lefu ke ena: Sa pele, e kgopo ebile e tletse ho rohakana, dipolao, bofebe, ditakatso, bohlola, boshodu, borapedi ba ditshwantsho, boloi, dithatho, ditlatlapo, bopaki ba bohata, boikaketsi, pelo e qeaqeaang, boqhekanyesti, boikgohomoso, lonya, manganga, mohono, dipuo tse dishila, mona, tello, le boithoriso. Hape e na le bahlorisi ba batho ba lokileng, ba hloileng nnete, ba ratang mashano, ho se tsebe moputso wa ho loka, ho se kgomarele se molemo le kahlolo e lokileng, ho tsheta masiu eseng bakeng sa botle empa bakeng sa bokgopo, ho ba hōle le bonolo le mamello, ho rata lefeela, ho

latella moputso, ho hloka mohau ho bafutsana, ho se sebeletse ya tlatlapuwang ka ho sehla ka thata, ho hloka tsebo ya Ya ba entseng, babolai ba bana, ho silafatsa dibōpuwa tsa Modimo, ho furalla bahloki, ho tlatlapa ba mahlomoleng, ho buella barui, boahlodi ba mafutsana bo hlokang toka, le boetsadibe bo felletseng. Eka le ka lopollwa ho tsena tsohle, bana ba ka.

### **Kgaolo 6**

Hlokomela hore "ha ho motho ya o lahlehisanang" ho tswa ho Tsela ena ya thuto, hobane a tla be a o ruta ntle le Modimo; etswe haeba o ka jara joko yohle ya Morena, o tla be o phethahetse, empa haeba o ke ke wa kgona, etsa seo o ka se kgonang. Mme mabapi le dijo, qoba ka tiyo se nyehelwang ho medingwana hoba seo ke borapedi ba medimo e shweleng.

### **Kgaolo 7**

Mabapi le kolobetso, kolobetsang ka tsela ena: Kamora ho ikwetlisetsa dintho tsena kaofela, kolobetsang ka Lebitso la Ntate, le la Mora, le la Moya o Halalelang, ka hara metsi a phallang. Empa haeba le se na metsi a phallang, kolobetsang metsing a mang; mme haeba le sa kgone ho kolobetsa metsing a batang, sebedisang a futhumetseng. Empa haeba le se na ona, tshela metsi ka makgetlo a mararo hodima hlooho, ka Lebitso la Ntate, Mora le Moya o Halalelang. Mme pele ho kolobetso ha ya tlo kolobetsang le ya tlo kolobetswang ba itime dijo – mmoho le ba bang ba kgonang. Le laele ya tla kolobetswa hore a itime dijo letsatsi le le leng kapa a mabedi pele ho moo.

### **Kgaolo 8**

Le se ke la dumella ho itima dijo mmoho le baikaketsi, hobane ba itima dijo ka Mantaha le ka Labone, empa lona le itime dijo ka Laboraro le ka Labohlano. Hape le se ke la rapela jwaloka baikaketsi, empa jwalokaha Morena a laetse Evangeding ya Hae. Le rapele ka mokgwa ona: "Ntata rōna ya Mahodimong, lebitso la Hao a le ke le kgethehe, ho tle Mmuso wa Hao, Thato ya Hao e etswe lefatsheng, jwalokaha e etswa Lehodimong; o re fe kajeno bohobe ba rona ba letsatsi le letsatsi, mme o re tshwarele melato ya rona jwalekaha re tshwarela ba nang le melato ho rona; o se ke wa re isa molekong, empa o re re lwele ho e mobe, hobane mmuso ke wa Hao, le matla le kganya ka ho a feleng." Rapelang Thapelo ena hararo ka letsatsi.

### **Kgaolo 9**

Mabapi le Diteboho, tshwarang Diteboho jwana; Sa pele, mabapi le senwelo: "Re lebisa diteboho ho Wena, Ntata rōna, bakeng sa Morara o Halalelang wa ngwana wa hao Davida, oo O re tsebisitseng oona ka Ngwana wa Hao Jesu. Ho Wena e be kganya ya nako tsohle." Le mabapi le bohobe bo robhileng: "Re a o leboha, Ntata rona, ka bophelo le tsebo eo O re tsebisitseng yona ka Ngwana wa hao Jesu. Ho Wena e be kganya ya nako tsohle. Jwalekaha bohobe bona bo robhileng bo ne bo hasane dithabeng, empa bo ile ba bokellwa mme ba fetoha ntho e le nngwe, ha Seboka sa Hao se ke se bokellwe hammoho ho tloha dipheletsong tsa lefatshe ho kena Mmusong wa Hao; hobane kganya ke Ya hao, le matla ka Jesu Krete ka nako tsohle." Empa ho se ke ha eba le motho ya tla jang kapa ya tla nwang Diteboho tsa lona, ntle le ba kolobeditsweng ka Lebitso la Morena – hobane mabapi le sena le Morena o itse: "Le se ke la fana ka se halalelang ho dintja."

### **Kgaolo 10**

Empa ka mora hore le kgore dijo, fanang jwana: "Re leboha Wena, Ntate ya Halalelang, ka lebitso la Hao le Halalelang leo O le entseng hore le dule dipelong tsa rona, le ka tsebo, le ka tumelo, le ka Bophelo bo sa feleng boo O re tsebisitseng bona ka Ngwana wa Hao Jesu. Ho Wena e be kganya ka nako tsohle. Wena, Morena Ya Matla Ohle, o hlotse dintho tsohle ka baka la Lebitso la Hao, mme Wa fa batho dijo le dino bakeng sa ho ithabisa, hore ba tle ba O lebohe, empa O re hlohonolofaditse ka dijo le dino tsa moya le ka lesedi le tswelang pele ka Ngwana wa Hao. Hodima tsohle re leboha Wena ka hore O matla. Ho Wena e be kganya ya nako tsohle. Hopola Phutheho Hao, Morena ho e lopolla bobeng bohle le ho e phethahatsa ka lerato la Hao, mme o e bokelle hammoho kgalalelong ya yona ho tswa meyeng e mene ho ya Mmusong wa Hao oo O e lokiseditseng yona. Hobane matla le kganya ke tsa Hao ka nako tsohle. Ha mohau o tle mme lefatshe lena le fete. Hosanna ho Modimo wa Davida. Haeba motho leha e le ofe a halalela, ha a ke a tle! Haeba motho leha e le ofe a se jwalo, ha a ke a sokolohe: Maranatha! Amen!" Empa dumellang baprofeta ho tshwara Diteboho kamoo ba ratang kateng.

### **Kgaolo 11**

Amohelang mang kapa mang ya tla tlang ho ruta dintho tsena kaofela tse boletsweng pejana. Empa haeba ya rutang a tswile tseleng mme a ruta thuto esele e senyang dintho tsena, le se ke la mo mamela; empa haeba thuto ya hae e le ya ho eketsa ho loka le tsebo ya Modimo, mo amohelang jwaleka Morena. Mabapi le baapostola le baprofeta, etsang jwana ho latela molao wa ditaba tse molemo: Ha moapostola e mong le e mong ya tlang ho lona a amohelwe jwaleka Morena, empa a se ke a dula nako e fetang letsatsi le le leng, kapa a mabedi haeba ho hloka hla; empa ha a ka a dula matsatsi a mararo, ke moporofeta wa bohata. Mme ha moapostola a tswa a se ke a amohela letho haese bohobe ho fihlela a fihla moo a robalang teng; empa ha a ka kopa tjelete, ke moporofeta wa bohata. Le seke la leka kapa la hlahloba moporofeta ofe kapa ofe ya buang a le Moyeng, "hobane sebe se seng le se seng se tla tshwarelwa, empa sebe sena se ke ke sa tshwarelwa." Empa ha se bohle ba buang ka moya e leng baprofeta, ntle le haeba ba ena le boitshwaro ba Morena. Jwale, ho latela boitshwaro ba hae, moprofeta wa nnete ya bitsang dijo a le Moyeng o tla di ja – ho seng jwalo, ke moprofeta wa bohata. Mme moporofeta e mong le e mong ya rutang nnete, ha a sa etse seo a se rutang, ke moporofeta wa bohata. Empa moporofeta ya hlahlobilweng mme e le wa nnete, leha a ka netefatsa sephiri sa lefatshe hara Phutheho, ha a sa rute ba bang ho etsa seo a se etsang ka boyena, o tla ahlolwa ke lona – hobane o na le kahlolo ya hae ho Modimo, jwaloka baprofeta ba kgale. Empa mang kapa mang ya tla re a le moyeng a re "Mphe tjelete, kapa ho hong," le se ke la mo mamela; empa haeba a ka le bolella hore le fane molemong wa ba bang ba hloka, ho se ke ha eba le ya mo ahlolang.

### **Kgaolo 12**

Ha e mong le e mong ya "tlang ka Lebitso la Morena" a amohelwe, empa ha le se le mo hlahlobile, le tla mo tseba – hobane le tla eba le kutlwisiso ya nnete le bohata. Haeba ya tlang ke motsamai, mo thuseng ka hohle kamoo le ka kgonang, haeba a ke ke a dula le lona matsatsi a sa feteng a mabedi kapa a le mararo haeba ho hloka hla. Mme haeba a lakatsa ho aha hara lōna' mme a ena le mosebetsi wa matsoho, mo lokiseditseng ho ya ka kutlwisiso ya lona, e le hore ho se ke ha eba le motho ya tla phela hara lōna e le setsebi sa mesebetsi ya matsoho a sa etse letho. Mo dumelleng ho sebetsa le ho ja; empa haeba

a se na kgwebo, ho ya ka kutlwisiso ya lona, mo lokisetseng hore a se ke a phela le lona jwaloka Mokreste ya sa sebetseng – ha a sa etse jwalo, o tla etsa Krete sephethephethe. Hlokomelang ba jwalo.

### **Kgaolo 13**

Empa moporofeta e mong le e mong wa nnete ya lakatsang ho dula hara lona o "tshwanetse dijo tsa hae". Ha jwalo le moruti wa nnete le yena o tshwanetse dijo tsa hae, le ho mosebeletsi ho jwalo. Kahoo le tla nka dilopotsiya tsa dihlahiswa tsa thitelo ya veine, le tsa tshilo, le tsa dikgomo le dinku, mme le tla di nehela jwaleka dilopotsiya tsa baprofeta, hobane baprofeta ke baprista ba baholo ba lona. Empa ha le sena moporofeta, di feng bafutsana. Haeba o etsa bohobe, nka dilopotsiya, mme o fane ka tsona ho ya ka taelo. Ka tsela e tshwanang, ha o bula nkgo ya veine kapa ya oli, nehela baprofeta dilopotsiya. Le ka tjelete hape le ka diaparo, le thepa yohle ya hao, nka dilopotsiya, ho ya kamoo o bonang ho le molemo ho wena, mme o nehele ho ya ka taelo.

### **Kgaolo 14**

Ka Letsatsi la Morena, bokanang, le robe bohobe, mme le tshware Diteboho, ka mora ho ipolela ditlōlo – hore nyehelo ya lona e be e hlwekileng; empa ho se be motho ya nang le qabang le molekane wa hae ya kenang kopanong ya lona ho fihlela ba boelana, hore sehlabelo sa lona se se ke sa silafala. Hobane sena ke se ileng se buuwa ke Morena, "Sebakeng se seng le se seng le nakong e nngwe le e nngwe nneheleng mahlabelo a hlwekileng, hobane ke Morena e moholo," ho bolela Jehova, "mme Lebitso la Ka le babatseha hara bahetene."

### **Kgaolo 15**

Kahoo, ipeheleng balebedi le bahlanka ba tshwanelang Jehova – banna ba mosa, eseng barati ba tjelete, ba nang le nnete le ba amohelang, hobane le bona ba le sebeletsa bosebeletsi ba baprofeta le baruti. Ka hona, le se ke la ba nyedisa, hobane ke banna ba hlomphehang ba lona, hammoho le baprofeta le baruti. Mme le se ke la kgalemelana ka kgalefo, empa ka kgotso jwalokaha le fumana ditabeng tse molemo. Hape le se ke la bua le mang kapa mang ya foseditse moahelane wa hae, ebile le etse hore a se utlwe lentse le tswang ho lona ho fihlela a sokoloha. Empa phethang dithapelo tsa lona, le mosa, le diketso tsohle tsa lona tseo le di fumanang ditabeng tse molemo tsa Morena wa rōna.

### **Kgaolo 16**

"Fadimehelang" bophelo ba lona; le se ke la "tlohela dilampi tsa lona" di time; mme le se ke la "tlohela matheka a lona" a sa tlangwa; empa ebang "malala-a-laotswe", hobane ha le eso tsebe "hora eo Morena wa rona a tlang ka yona." Empa bokellanang mmoho kgafetsa ho batla dintho tse ruisang meya ya lona molemo, hobane nako yohle ya tumelo ya lona e ke ke ya le tswela molemo ntle le hore le fumanwe le phethahetse ka nako ya ho qetela: hobane matsatsing a ho qetela baprofeta ba bohata le ba silafetseng ba tla ata, mme dinku di tla fetolwa diphiri, mme lerato le tla fetoha lehloyo; hobane ha tlōlo ya molao e ntse e eketseha ba tla hloyana, mme ba tlatlape, ba eke, mme ebe mothetsi wa lefatshe o tla bonahala eka ke mora wa Modimo – o tla etsa dipontsho le dimakatso, mme lefatshe le tla nehelwa matsohong a hae, mme o tla etsa ditlolo tse sokang di eba teng ho

tloha lefatshe le qala. Jwale tlholeho ya moloko wa batho e tla tla nyeweng e tukang, mme "ba bangata ba tla kgopiseha" ba lahlehe, empa "ba tiisetsang" tumelong ya bona "ba tla pholoswa" ke thohako ka boyona. Mme "jwale ho tla hlaha matshwao" a nnete. Pele, pontsho e ile ya hasana lehodimong, ha latela pontsho ya modumo wa terompeta, mme la boraro ke tsoho ya bafu – empa eseng ya bafu bohle, empa jwalokaha ho boletswe, "Morena o tla tla le bohle ba Halalelang ba Hae." Jwale lefatshe le tla "bona Morena a tla ka maru a Lehodimo."

Qetellong, ena ke thuto ya Morena ho Bahetene ka Baapostola ba Leshome le Metso e Mmedi. Ho nahanwa hore e ngotswe dipakeng tsa AD50 le AD150. Tokomane ena e akaretsa melao-motheo ya Bokreste ya bophelo ba bomodimo, tshokoloho le meetlo. Molaetsa ona o bohlokwa haholo mme ke kopa bahlanka bohle ho o bala ka kutlwisiso le ho o fetisetsa ho maloko ohle a kereke, mme bohle ba lokela ho phethisa se ngotsweng molaetseng wa Deuteronomo 4:32. Lengolo lena la Deuteronomo le re ruta hore re lokela ho batla le ho tseba moo bohle re tswang teng. Lengolo la Jubile 12:17-20 le baleha tjena: "17. Lentswe la kena pelong ya hae, mme a re: Dipontsho tsohle tsa dinaledi, le matshwao a ngwedi le letsatsi kaofela di matsohong a Jah. Ke hobaneng ha ke di batla? 18. Haeba A lakatsa, O nesa pula, hoseng le mantsiboya; mme ha A lakatsa, O a e hanela, mme dintho tsohle di letsohong la Hae. 19. Mme a rapela bosiuung boo mme a re, 'Modimo wa ka, Modimo o Phahameng ka ho Fetisisa, Ke wena feela ya bopang Modimo wa ka, mme ke kgethile wena le mmuso wa Hao. Mme O bopile dintho tsohle, le dintho tsohle tseo e leng mosebetsi wa matsoho a Hao. 20. Nkise matsohong a meya e kgopo e nang le matla hodima mehopolo ya dipelo tsa batho, mme e se ke ya nteleka ho Wena, Modimo wa ka. Mme o thehe Wena le peo ya ka ka ho sa feleng hore re se ke ra kgeloha ho tloha jwale ho ya pele le ka ho sa feleng."

Molaetsa ona ha o tswe ho nna empa o tswa ho Morena wa rōna Jesu Krete ya re shwetseng hore re tle re pholoswe.

Wa Lona

**Ntate Moapostola H MKHONZA**

**04-08-2025**